

**Ն.Ս.Օ.Տ.Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ԽՈՍՔԸ
ՀԸՆԹԱՅՍ ՍՈՒՐԲ ՊԱՏԱՐԱԳԻ ԱՐԱՐՈՂՈՒԹՅԱՆ**

(Վաշինգտոն, մայիսի 9, 2015 թ.)

Յանուն Հօր եւ Որդոյ եւ Հոգւոյն Սրբոյ. ամէն:

«Ամենայն որ ամէն զարդարութիւն
առ ի նմանէ ե ծնեալ»
(Ա. Յովհ. Բ. 29):

Սիրելի՛ բարեպաշտ հայորդիներ,

Աղոթաբույր այս տաճարում հավաքվել ենք Հայոց ցեղասպանության 100-րդ տարելիցի ոգեկոչման առիթով: Սրբազան Պատարագի ընթացքում ունկնդիր եղանք Հովհաննես առաքյալի Բ. թղթի հետեւյալ խոսքին, թե ամեն ոք, որ արդարություն է անում, Նրանից, այսինքն՝ Աստծուց է ծնված: Աստծուն որդիանալը առաքյալը պայմանավորում է մարդու արդարությամբ: Արդարության մասին առաքյալի ուղերձը ամբողջանում է այսօր ընթերցված Ավետարանում՝ ի ծնե կույրի պատմության դրվագով (Յովհ. Թ.): Մեր Տերը՝ Հիսուս Քրիստոս, ինչպես պատմում է ավետարանիչը, բժշկում է ի ծնե կույր մի մարդու: Փարիսեցիները, սակայն, չեն ընդունում հրաշագործ բժշկության փաստը եւ տաճարից արտաքսում են բժշկվածին: Տիրոջից տեսողություն ստացած անձը ձեռք է բերում նաեւ հոգեւոր տեսողություն եւ ճանաչում Քրիստոսին՝ որպես «լոյսն աշխարհի» (Յովհ. Թ. 5): Մինչդեռ տեսողություն ունեցողները կուրանում են ճշմարտության առջեւ: Ահա ավետարանական մի պատում, որ նկարագրում է հոգեւոր կուրության ողբերգությունը՝ պայմանավորված ճշմարտության, ակնհայտ իրողության ժխտումով, որը ծնեց անարդարություն եւ չարիք:

Ավետարանական այս պատումն այսօր եւս արդիական է: Մեր ժողովուրդը 100 տարի շարունակ բախվում է Թուրքիայի կողմից Հայոց ցեղասպանության փաստի ժխտման քաղաքականությանը: Թուրքիան իր ժխտողականությունն իրագործում է պետական մակարդակով, դիվանագիտական խարդալանքներով ու ճնշումներով: Ժամանակը, ինչպես եւ այսօր Ցեղասպանության 100-րդ տարելիցի միջոցառումները ցույց տվեցին, որ անհեռանկար է Թուրքիայի այս ամոթալի քաղաքականությունը: Ճշմարտությունը, արդարու-

թյան մեր կանչը արձագանքում են աշխարհում, մարդկանց, ժողովուրդների սրտերում: Նորանոր երկրներ, պետական կառույցներ, հեղինակավոր կազմակերպություններ ճանաչում եւ դատապարտում են Ի. դարասկզբին մեր ժողովրդի դեմ կատարված ոճրագործությունը՝ որպես ցեղասպանություն: Մակայն միաժամանակ ականատես ենք որոշ պետությունների կրավորական կեցվածքին, որն առայժմ դիրքորոշումն է նաեւ Ամերիկայի Միացյալ Նահանգների:

Ճշմարտության ճանաչումը, արդարության իրագործումն անհրաժեշտ է ոչ միայն մեր ժողովրդին, մեր նահատակներին, որոնք այլեւս սրբադասված՝ բարեխոս են աշխարհում արդարության, մարդասիրության, խաղաղության համար, այլեւ նույնքան՝ Թուրքիային՝ սեփական պատմությանն առերեսվելու, անցյալի ոճրագործության մեղքը թոթափելու համար. անհրաժեշտ է նաեւ ազգերի ու ժողովուրդների մեծ ընտանիքին՝ հաշտ ու խաղաղ իր ապագան արդարության հիմքի վրա կառուցելու համար:

Արդարության իրագործումը ճանապարհ է աստվածամանության, երկնավոր Հոր պարգեւած որդիության շնորհին արժանանալու: Այս է հաստատում առաքյալը՝ ասելով, որ արդարություն գործող ամեն ոք Աստծուց է ծնված: Մինչդեռ արդարության ժխտումը՝ քաղաքական, տնտեսական կամ շահադիտական այլ պատճառներով, հեռացնում է Աստծուց, մարդկության կյանքը ենթարկում վտանգների: Արդարության անտեսումով, ոճիրների անպատժելիությամբ աշխարհը ականատես եղավ նոր ցեղասպանությունների, մեր օրերում շարունակվող ահաբեկչությունների, զանգվածային կոտորածների, արյունահեղությունների: Առաքյալի՝ երկնավոր Հորը որդեգրվելու հորդորը կոչ է արդարությունը մշտապես իրագործելու՝ անձնական, պետական եւ հասարակական կյանքում: Կոչ է ճշմարտության պաշտպանության ու հաղթանակի՝ բացառելու ճշմարտության եւ արդարության առջեւ փարիսեցիական կուրությունը, որպեսզի մարդկությունը կարող լինի ընթանալու դեպի արդար, բարօր եւ համերաշխ աշխարհ:

Միրելի՛ բարեպաշտ ժողովուրդ, որպես արդար Աստծո որդիներ՝ պիտի շարունակենք աննվազ ջանքերը մեր ազգի հանդեպ, ինչպես եւ՝ մարդկության կյանքում արդարության հաստատման ու հաղթանակի համար: Այս ձգտումով եւ ոգով մեր ժողովուրդն իր մասնակցությունը բերեց Երկրորդ աշխարհամարտի տարիներին ֆաշիզմի դեմ պայքարում, ինչպես նաեւ Արցախ աշխարհի ազատագրման գործում, որոնց հիշատակումով հաղթական ու տոնական են մայիսյան այս օրերը: Հայրապետական Մեր հորդորն է, որ հաստատուն մնաք արդարության մեր պայքարում, անսասան՝ ազգաշեն ու հայրենաշեն ընթացքներում, շարունակեք բարի արարումներով շենացնել

ազգային-եկեղեցական մեր անդաստանը, զորացնել պետական եւ հայրենական մեր կյանքը: Հայրենիքը, պետականությունը եւ Եկեղեցին այն արժեքներն են, որոնք ամուր են պահում ազգի գոյության, ազգային ինքնագիտակցության հիմքը: Զորեղ լինի հայրենիքը, զորեղ կլինի նաեւ ազգը, եւ դրանով նույնքան զորեղ՝ մեր պահանջատիրությունը՝ Յեղասպանության համընդհանուր դատապարտման, հատուցման եւ հետեւանքների վերացման:

Հայրենավիրումի, ազգանվիրումի ոգին է, որ պիտի առաջնորդի մեզ՝ համախմբվելու ազգային մեր անդաստանում ծառացած խնդիրների դիմագրավման համար: Հայրենաբնակ հայորդիների կյանքում հառնած մարտահրավերները, արցախյան հիմնահարցը, հակամարտությունների պատճառով սիրիահայության եւ իրաքահայության դժվարին կացությունը շեշտում են հրամայականը՝ միաբանությամբ հաղթահարելու առկա նեղություններն ու խնդիրները: Եղբորն աջակցելը, ազգ ու հայրենիք շենացնելը նույնպես արդարության իրագործում է, ըստ Աստծո կամքի ընթանալու հաստատականություն եւ Նրա որդիության շնորհին արժանանալու երաշխավորված ուղի:

Մեր աղոթքն ենք վերառաքում առ Բարձրյալն Աստված, որ խաղաղ երկնքի ներքո, շենության ու բարօրության մեջ պահի, պահպանի Ամերիկայի Միացյալ Նահանգները, մեր հայրենիքն ու ողջ ժողովրդին, պարգեւի հավատավոր գործոց հաջողություններ եւ երկնառաք բյուր բարիքներ:

Սրտագին ողջունում ենք ներկայությունը Քույր Եկեղեցիների ներկայացուցիչների, ի մասնավորի՝ Կաթոլիկ Եկեղեցու հոգեւորականաց, որ եղբայրական սիրով ու պատրաստակամությամբ հնարավորություն ընձեռեցին Պատարագ մատուցելու այս սրբազան տաճարում:

Մեր Տեր Հիսուս Քրիստոսի շնորհները, սերն ու ողորմությունը թող լինեն ձեզ ամենքիդ հետ. ամեն: